

欽定剿平粵匪方略

欽定勦平粵匪方略卷二百七十一 辛酉年

七月二十九日

乙卯

毓科奏言前陷吉安之賊被

勦下竄窺伺瑞袁臨三府經臣檄飭知府丁峻

扼守臨江郭式源扼守峽江道員劉于愼參將

孫昌國各撥江軍水師沿河堵禦並飛咨督臣

曾國藩等飭調總兵鮑超等軍來江援應三月

十五日賊由廬陵東竄攻撲吉水縣城知縣唐

嘉德率勇固守適知縣丁日昌自郡來援該逆
間有援師引去遂分兩股一由正道北竄峽江
之中坳烏口一由別道竄新喻之羅坊其竄新
喻者所過焚掠有分犯臨瑞之意臣以臨郡已
有丁峻一軍扼守瑞州甚屬空虛飛飭郭式源
馳抵瑞郡而郭式源自擊退峽江之賊聞另股
已由新喻繞出其背先已回軍臨江是時峽江

收賊被新淦鄉團擊回遂合新喻股匪屬聚於
陰岡嶺丁峻卽與知府單興詩等布置戰守事
宜迨郭式源入城亦卽登陴協守三月二十一
日賊分三股攻南北西三門南門外有土阜甚
高賊踞其上我軍連環開礮斃賊十餘名賊勢
稍卻次日賊由北門抄至東門及東南門經江
軍水師礮船擊回遂併攻南北西三門賊首譚

姓在南門督隊故南面之賊尤多次日郭式源
率平江營出西北門練勇廣勇出東南門兩路
夾抄丁峻率彰奇營出南門迎擊賊見我軍三
面齊起亦分隊抗拒丁峻首先衝入賊營砍斃
騎馬黃衣賊目練勇廣勇從旁抄擊殺賊數十
名賊陣大亂西北之賊見南路賊潰頗形驚惶
我軍乘勢衝突逆衆紛紛奔逃城圍立解跟追

二十餘里斬賊百餘名是夜郭式源丁峻復派
隊追斬十餘名探知賊衆悉匿陰岡嶺慮其有
伏未敢窮追該逆偵知瑞州空虛遂悉衆犯瑞
郭式源卽於臨郡解圍後進攻陰岡嶺之北署
知府陸澄先已派勇駐紮於陰岡嶺之南時副
將李金鵬由分宜抵陰岡嶺與郭式源一軍相
合戰賊於灰埠等處疊有斬擒復約會李金鵬

大戰於太陽墟忽另股賊匪由隴中包抄我軍
後路郭式源急令營官張詩華回救已見後路
營盤火起李金鵬被擒四面皆賊郭式源遂歿
於陣陸澄等先在南城守禦因賊大股竄逼退
保北城四月初六日賊併力圍攻城中鉛藥垂
盡又聞援軍失利守陴兵勇一日數驚該逆遂
焚東門而入瑞郡被陷平江和後兩營旣敗績

於太陽墟卽經臣飛飭劉于道移防撫之師以
援瑞並嚴飭瑞州及距瑞附近之各州縣集團
固守以待援師逆賊欲截我軍各路援兵遂分
股四出西竄上高新昌北竄奉新安義竄上高
者經知縣趙有梯等帶團扼之灣頭斜口大塘
黃岡等處頗有斬獲賊竄新昌之漆姓地方羅
裕力戰陣亡新昌之茶口棠浦等處先被該逆

另股竄入至是與敗竄漆姓之賊合攻縣城知縣趙樸庭等率勇堵禦衆寡不敵新昌縣城遂陷竄奉新者先經該縣知縣張國英招勇駐守賊由山僻竹小地方疾趨而入直逼縣城並放礮轟塌城垣丈餘卽有騎馬悍賊數百名由城缺衝進奉新縣城遂陷安義縣知縣鍾泰探聞賊擾奉新調團入城協守賊分隊來撲縣城勢

甚兇很鍾泰分路迎勦斃賊數十名賊始逸去
復督同生員魏象書等連戰於仁首乾洲珠珞
龍頓山柞林等處先後斃賊無數並拏獲賊探
十餘名賊始竄逸安邑境內已就肅清臣查此
股逆匪係僞忠王李秀城所統狡悍異常此次
自吉安竄臨經該文武實力保全尙屬著有微
勞容俟查明酌保數員用示獎勵瑞州因援軍

失利遂致淪陷鮑超以攻勦集賢關留皖劉嶽
昭以攻勦隨州留鄂江省雖尙有信防撫防各
軍均爲皖閩賊匪所牽掣以致瑞州所屬之上
高新昌南昌所屬之奉新南康所屬之安義或
被竄陷或被騷擾臣督防無狀相應請

旨交部議處署瑞州府知府陸澄等失守城池咎無
可諉相應請

旨卽行革職如查有棄城避匿及諱飾鋪張情事再行從嚴叅辦平江營統領郭式源勦賊陣亡應請

飭部從優議卹並陣亡之武舉羅裕生員王惠疇一併附請議卹其餘陣亡員弁兵勇暨瑞州府同城併新昌奉新各縣文武查明另行辦理營官李金鵬在太陽墟爲賊所擒旋即逃出赴省自

首業已解赴會國藩軍營訊明正法奏入

上諭內閣曰江西吉安賊匪竄撲臨江府城經知府
丁峻等協同戰守賊旋敗走乘虛竄陷瑞州府城
並分竄上高安義及陷新昌奉新江西巡撫毓科
督防不力致所轄地方疊被賊陷著交部議處署
瑞州府知府陸澄署瑞州營都司劉青雲高安縣
知縣劉奎光署新昌縣知縣趙樸庭署奉新縣知

縣張國英均著卽行革職江西候補道郭式源在
太陽墟剿賊陣亡著交部從優議卹陣亡之上高
縣武舉羅裕安義縣生員王惠疇著一併交部議
卹其瑞州府新昌奉新各縣文武下落均著毓科
查明具奏

毓科又奏言據督辦江西團練大臣三品京堂
銜劉繹咨報親母聶氏因病身故例應丁憂已

禮委前任湖南辰沅永靖道鍾音鴻接受木質
關防暫行代理相應奏明或另派大員接辦國
練事宜抑仍令該大臣墨經從事以資熟手之
處出自

聖裁奏入

上諭內閣曰督辦江西團練大臣三品京堂銜劉繹
現丁母憂例應守制惟江西省現當賊氛肆擾軍

務正殷該省團練協同官軍防剿著有成效所有
江西團練事宜仍著劉繹督辦毋庸另行派員接
辦

三十日 丙辰 瑞昌王有齡奏言現接探報江西另

股賊匪闖入德興婺源逼近開化另有花旗一
股已至鉛山河口地方均將犯浙衢州常山開
化同時喫緊刻下蘭谿未復衢防隔絕在外猝

然有警援應兩難且洞庭東山賊船數百號窺伺大錢口一帶石門之賊復竄新市意將夾攻湖州勢尤岌岌臣等兵無可撥江西之賊若復源源而來實屬措手不及因思督臣慶端督剿汀州逆匪所向克捷現在福建全省業已肅清浙省本係督臣統轄之地合無仰懇

聖恩飭令督臣速提得勝之師裹糧來浙駐紮衢州

督辦防剿不特三衢藉資保障卽閩省與浙江
江西交界之建甯邵武等府防務亦可就近兼
顧庶閩浙聯爲一氣諸事呼應較靈於大局深
有裨益

瑞昌王有齡又奏言五月二十八日菱湖之賊
併向思溪紮營趙景賢力攻竟日方始收隊次
日探悉賊已東走雙林該處本有礮船二十隻

陸軍千餘人駐守當派遊擊李楚材前往督戰
自帶水師至雙福漾爲夾攻計不意李楚材接
仗失利全營潰敗雙林遂爲賊踞是夜遊擊陳
永春到湖三十日與都司唐德明等所帶礮船
槍船合隊進剿屢戰屢勝一氣攻進三橋賊向
烏鎮練市一帶逃去我軍追斬數百人當將雙
林收復維時北路賊匪先於前月二十九日由

洞庭山來經局董沈平彰等會同夾擊賊遂揚
帆而遁初一日賊復由水路撲犯夾浦由陸路
竄入新塘趙景賢連夜趕回湖防卽派礮船八
隻赴大錢口堵禦又調礮船十隻由塘口直至
新塘約會夾浦一軍兩面兜剿賊仍敗走而東
路震澤之賊又直撲南潯趙景賢派千總劉福
隆礮船都司熊得勝陸軍前往堵截會同東路

各團登時擊退臣等仍札飭趙景賢會同地方
文武一面招集流亡一面嚴密守禦以保湖防
同日王履謙奏言賊匪由江西竄入浙境武義
之賊又復蠢動不數日開而處州府城及遂昌
松陽永康三縣相繼失陷自處州至金華一片
賊蹤賊不東竄溫台卽北竄甯紹我兵防守尤
須分外加嚴近聞永康之賊併入金華盡力下

竄統兵之文瑞迎戰失利節節退守迨義烏被陷又復退至諸暨該逆長驅而入竟有直犯紹興之勢幸吳再升一軍由撫臣王有齡催令前進米興朝一軍移紮蘭谿軍威爲之稍振而各處民團又能聯絡一氣守住隘口該逆當由原路退回金華堅閉不出義烏亦卽收復處州永康聞亦陸續退出此次轉危爲安實由援兵民

團之力現接撫臣來函已催令各軍進剿提臣
饒廷選與新任藩司林福祥力攻蘭谿一俟得
手卽會合吳再升米興朝兩軍夾攻金華以爲
拊背揜吭之計惟浙省兵勇多係委靡不振可
恃以爲用者祇有饒廷選一軍但人數無多大
半又留守省垣其次則吳再升所統各兵尙肯
認真打仗近日藩司林福祥所部各勇聞亦係

生力之兵此外皆未足深恃是以四月至今爲期不及三月府城被陷者兩處縣城被陷者又十餘處軍務之廢弛臣亦不忍再言若非另調勁旅痛加勦洗不但已陷郡縣一時未能恢復轉恐完善地方又將被賊蹂躪臣查閩省官兵曾經勦辦粵匪屢戰屢捷前聞汀州收復通省肅清臣曾函商督臣慶端囑其酌帶援師裹糧

南下嗣接撫臣咨會已調總兵曾玉明副將林
文察兩軍督隊來浙與臣意見相同合無仰懇
天恩迅飭督臣慶端察看情形或自行統兵或派員
督隊以救浙省生靈大局幸甚生民幸甚至紹
興城守事宜臣已會同前臬司段光清暨知府
懷清等周歷查看分別布置應備守城器具亦
已陸續製辦所募義勇及所集各勇雖共有四

千餘人而地面遼闊不足以資捍禦現又分派紳士馳赴沙地添募壯勇分布要隘以壯聲威其謝敬一軍前因勦辦土匪調回餘姚現在首犯就獲餘姚上虞二縣餘匪均已撲捕淨盡自應檄令回紹扼要駐紮郡城編查保甲稽察奸細臣督飭官紳妥爲辦理均尙認真人心藉以稍定均奏入

上命載垣等傳諭慶端曰江西股匪闖入德興婺源
又有另股已至鉛山河口地方均將犯浙衢州崇
山開化同時喫緊該省蘭谿尙未克復衢防隔絕
勢旣難爲援應且洞庭東山賊船窺伺大錢口一
帶石門之賊復竄新市湖州勢尤岌岌浙省兵勇
更難分撥又金華賊匪併合永康之賊竄陷義烏
處州遂昌等府縣城雖經陸續收復而金華蘭谿

踞賊狡猾仍恐四出蹂躪福建汀州賊匪業已肅
清慶端結轉浙省責無旁貸著卽速提得勝之師
籌備糧餉迅卽赴浙督辦防勦務將金華蘭谿賊
匪迅圖掃蕩保全甯紹完善地方衢州與閩省毗
連該督到浙自應擇要駐紮力籌保障卽閩省與
浙江交界之建甯邵武等處防務亦可就近兼顧
瑞昌王有齡又奏言處州敗匪向桃花嶺一路

竄去署溫處道志勦派兵追剿五月十九日賊
進陷緡雲縣城該縣馮格商同文武官紳帶團
協擊該逆紛紛逃遁於二十日竄往永康地方
緡雲當卽收復惟遂昌松陽二縣尙爲賊踞志
勦派遊擊黃載清督勇勦辦遂昌縣知縣鄧逢
昌率領民練攻城適官軍自碧湖一帶長驅而
來面面夾擊賊遂四散奔逃松陽踞匪亦不敢

拒於五月二十二十一等日次第收復兩城先是遂松之賊屢次圖竄宣平均經知縣何仁杰督團擊退十四日賊由遂昌小路突入西門該縣無城可守暫退南門外駐紮逆衆亦卽出城何仁杰會同汎弁等糾集各鄉民團痛勦該逆退踞坳塘溪口一帶二十一日黃載清由松陽督隊進攻殺賊無數賊復由北鄉陶村退竄武

義宜境已無賊蹤該署道會商處州鎮特保督帶官兵前往桃花嶺荆坑等處紮營防禦復令黃載清添募台勇士勇共一千二百名在水陸各門晝夜巡防一面行令遂松宜縉等縣鼓勵民團與派防之兵聯絡策應以期有備無患臣等查遂昌松陽縉雲宣平等縣經官兵民團次第收復處境一律肅清辦理尙屬迅速所有在

事出力員弁紳董可否俟金蘭克復之後容臣
等擇尤請獎縉雲縣知縣馮格署宣平縣知縣
何仁杰署遂昌縣知縣鄒逢昌失守城池旋即
收復功過尙足相抵合無仰懇

聖恩免其治罪仍革職留任責令辦理善後撫恤事
宜署松陽縣知縣何衍宗據稱接仗受傷病勢
沈重已由該署道委員代理應請

旨將何衍宗先行革職同該府及各該縣佐雜教職
備弁各官一併歸案查辦奏入

上諭內閣曰處州敗匪竄陷縉雲縣城經知縣馮格
等會同官軍協擊將縉雲縣城收復其遂昌松陽
二縣踞賊亦經署知縣鄭逢昌率團夾擊次第收
復兩城遊擊黃載清等復於宣平之坳塘等處殺
賊無數賊由陶村退竄武義處州屬境一律肅清

所有在事出力員弁紳董著俟金華蘭谿克復後
併案奏請獎勵其失守城池自行收復之縉雲縣
知縣馮格署宣平縣知縣何仁杰署遂昌縣知縣
鄭逢昌均著免其治罪仍革職暫行留任署松陽
縣知縣何衍宗未能收復城池著先行革職與該
府縣文武各官一併交王有齡歸案查辦如有棄
城逃避情事卽著從嚴叅奏

瑞昌王有齡又奏言據張玉良饒廷選等先後
咨稱五月二十六日永昌逆股來撲橫山營盤
張玉良傳令各營固守一面派兵埋伏並分紮
橫山左右以爲各營接應該逆撲近濠邊副將
況文榜等擊以槍礮相持不退我伏軍從山後
突出賊恐截其歸路忽爾回奔各營同時出剿
韓瑩騎馬悍賊數名墜崖死者尤衆是日蘭谿

城內之賊於河隄安置礮位向我師船轟打副將貴廷芳登岸撓勦斃賊甚多賊敗退回城先有七八百名撐駕船簞渡過南岸圍撲副將劉萬德營盤我軍由營後抄出賊走河邊適都司李光礮船趕到賊不得渡我軍沿河追殺擒斬殆盡其梟水而過者不及二三百名二十八日饒廷選自嚴州馳抵蘭谿時張玉良駐軍東南

在蘭河之上饒廷選卽駐軍西北在蘭河之下
兩軍互爲犄角並令知縣張振新帶勇在蘭谿
北門外黃門灘地方紮營該逆山城來撲饒廷
選派副將楊金榜帶隊迎勦賊復分股數千繞
出東門欲將我軍圍裏都司郭連城督帶漳勇
飛入賊隊斬賊三四十名復經貴廷芳等師船
在西北河沿連環放礮斃賊不少並將城牆轟

場數尺六月初一日饒廷選移向黃門灘駐紮
該逆於北門外添紮一營以抗我軍張玉良等
亦令副將況文榜沿河趕築礮臺於初三日分
路攻剿並於北門外設伏以待饒廷選親督水
陸各軍進攻西北兩門張玉良親督所部進攻
東南兩門乘勢襲取道士山一帶賊壘該逆出
城迎敵我軍更番疊擊斃賊無算賊不稍卻適

伏軍從左右抄至賊始大潰回城其派攻南門
各隊亦蹋毀寶塔根賊卡一座六月初四日我
軍火燒南北兩門附城房屋煙燄蔽空賊多站
立道士山頭俯瞰城內我軍勢難攻奪遂各收
隊回營據諸暨縣等稟報義烏之賊已竄近蘭
谿文瑞退回諸暨縣城米興朝亦自蘭谿移紮
善坑嶺距諸暨義烏均五六十里吳再升由西

興陸路前進初二日行抵諸邑卽派隊馳往善坑會商米興朝進剿該逆卽回竄金華而去義烏已無賊蹤查蘭谿大兵雲集日夜圍攻賊勢已蹙饒廷選等以林福祥一軍行過蘭谿復留助剿共圖克復惟克復之後敗匪非歸併金華卽下竄浦江現在張振新等諸軍紮營蘭谿之北扼其下竄之路臣等又飛調副將劉長培因

勝營千人前赴諸暨與都司劉如玉駐守浦江之軍聯絡扼堵義烏一路尙有兵勇七八千人擬卽進攻金華節節掃蕩

瑞昌王有齡又奏言藩司林福祥督帶定武各軍於六月初四日行過蘭谿饒廷選留之助剿該藩司卽在水埠紮營與黃門灘互相聯絡初七日張玉良派參將羅大春攻取天壇山賊營

副將劉萬德襲取上下郭村賊營自率小隊由金華港渡河而進羅大春等直抵賊濠環施槍礮賊退入壘中其郭村之賊出踞河邊我軍對岸轟打賊不能搶渡復有另股由大橫山竄至當飭副將韓廷貴等各率所部分剿將賊擊敗斬獲甚多據城中逃出難民供稱僞侍王李侍賢已由義烏帶同死黨到蘭初八日張玉良督

帶水師進攻蘭城中路饒廷選督帶所部由黃
門村進攻蘭城北路將至天壇山賊營李逆率
黨來援羅大春單騎衝殺手刃悍賊二名都司
李光亦率領礮船連環轟擊城中復潛出騎馬
悍賊數百渡河攻我營盤都司劉廷芳督勇開
礮轟斃黃衣賊目賊始退卻羅大春等乘勝掩
殺斃賊無算西南股匪又分四路來犯張玉良

派張鴻漸等分投擊退是日饒廷選督率副將
貴廷芳等師船由黃門灘直抵西門城下循環
放礮城上之賊被我擊倒甚衆又將賊牆轟塌
數丈時林福祥由黃門村進薄北門城根城賊
繞出東門已過小嶺遊擊田宗友等由前嶺壓
下知縣林崧等以伏軍橫擊之立將執旗悍賊
擊斃並生擒數名該逆狂奔入城林福祥見東

路賊匪已退復偕副將楊金榜將北門之三甕橋靛青原賊卡全行燒燬初九日西岸永昌之賊至水埠後嶺搖旗吶喊石城內亦出賊數千繞至黃門村之後均經水陸官軍擊散是夜張玉良密派副將況文榜等暗劫賊營火光四起該逆驚惶奔走自相踐踏及轟斃者約計二三百名踏毀賊營二座初十日城內賊匪由東門

斜出排至橫山腳下分撲羅大春等三營張玉良飛派都司冶萬全等馳往援剿賊衆紛紛敗潰我軍追殺至酒瓶鋪而回俘馘不少時副都統關福率領師船於西北河沿更番開礮饒廷選親督楊金榜等就北門河沿環繞力戰斃賊數百名林福祥自督定武中營由黃門村進剿以左右後三營繞至東山腳包抄而入賊從尖

山下壓我軍開礮轟擊該逆中礮倒地及爲人
馬踐踏死者不可計數詎意山上又壓下一股
弁命抗拒我軍連斃執旗賊目數名復有悍賊
出城助戰軍功李發明陣亡勇丁陳發標等衝
入賊隊立斬黃衣老賊二名均因回身入陣中
槍陣亡我軍以劈山礮連環進擊賊屍枕藉填
滿濠坑其左右後三營亦將東山腳賊營踏毀

賊衆大敗由山後竄入蘭城十三日張玉良饒
廷選商同林福祥前往攻城仍令劉萬德等進
攻天壇山賊壘我軍正在渡河見南門出賊數
千上下郭村之賊又繼擁而至勢將夾撲張玉
良卽率隊回營羅大春等亦仍回南岸憑營施
放槍礮賊不稍卻劉萬德帶領水陸各軍奮勇
直前冶萬全帶隊攔擊該逆抵敵不住涉水而

遁淹斃甚夥饒廷選林福祥正攻東北二門該
逆由東門擁出旋聞定武軍水埠營盤被圍林
福祥傳令固守先將城東之賊擊回始率中營
小隊轉戰而西回救水埠饒廷選等率隊助之
定武軍衝上兩箇山頭該逆以全股來撲經礮
船開礮轟擊楊金榜抄襲其後賊爲披靡退入
山梁而去十五日賊股由西邊沿河下竄女埠

紮營十餘座南岸之賊又圍攻張玉良營盤均
經我軍擊敗退回山塢查賊匪占踞蘭城我軍
疊次進攻每戰必捷惟官軍祇有萬餘寡衆懸
殊已形岌岌臣等當派閩勇一千五百名前往
蘭谿協助並飛催文瑞米興朝吳再升等進攻
金華迅圖克復以便赴蘭會剿奏入均報

聞

欽定勦平粵匪方略卷二百七十二 辛酉年

八月初一日丁巳瑞昌王有齡奏言我軍攻勦蘭

谿踞匪疊勝另股由西岸下竄女埠紮營屢撲
林福祥水埠營盤不能得手欲由女埠過河兩
岸紮成蔽壘以斷我軍餉道六月十六日我軍
卽於女埠對岸立紮三營該匪過河衝突數次
均經擊回以我水埠兵單復由後嶺乘夜來撲

林福祥往來督戰賊衆數萬更番疊進我軍以一當百血戰竟夜賊始敗退十九日饒廷選派隊會同林福祥進攻女埠賊營自督礮船上下轟擊踏毀逆卡二座斬獲無算探聞女埠之賊已由三河竄至大洋該處既可東達浦江又可下駛嚴州當與張玉良商派參將羅大春馳赴大洋截剿時嚴州祇有副將陳步高在防兵力

單薄該逆竄至郡城三里許陳步高分派所部扼守各門並飛調分防羅埠一軍來援賊已由高峯嘴渡河而來陳步高帶隊迎敵斃賊不少賊卽分股抄至東南兩門忽報東門已開副將陶占魁帶勇衝出賊已自東門進城並闢南門已破知府李文瀛等巷戰不敵由西門繞道而出時在東關下集隊再圖克復張玉良饒廷選

在蘭谿聞報遂於二十一日先後拔隊一面檄飭羅大春先從大洋進發羅大春馳抵嚴州由東南渡河直薄城下鏖戰通宵五更趕架雲梯爬城而上殺斃守城逆匪數十名張玉良饒廷選林福祥所部前隊亦到同時進攻嚴州城府卽於二十二日克復餘匪向西路奔逃張玉良等後隊踵至張玉良督隊由北追至烏龍嶺饒

廷選及林福祥督隊由西追至鍾潭嶺沿途斃
賊數百該逆在距嚴州三十里之楊村屯聚欲
搭浮橋以渡蘭谿賊衆直撲郡城張玉良等卽
於放馬洲等處紮定營壘扼截蘭河口岸及嚴
江要隘二十四日張玉良派兵分路追剿行至
花園亭地方與賊相值轟斃賊匪甚夥饒廷選
林福祥亦各派隊伍三路掩殺斃賊無數賊衆

大嶺西岸之賊退至洋溪南岸之賊退至大洋
賀秉鈞礮船亦在小洋地方擊沈賊船數隻賊
卽乘閒遁去查僞侍逆李侍賢糾合悍賊十餘
萬占踞蘭谿壽昌乘機竄陷嚴州幸張玉良所
派羅大春一軍勇往直前攻克堅城戰守較有
把握惟蘭谿之賊竄至馬淵大塘等處浦江首
當其衝臣等已派總兵文瑞等分紮浦江義烏

以撥下竄甯紹之路現擬以張玉良防守嚴州
由大洋一路進剿饒廷選馳赴諸暨會同林福
祥各軍由浦江一路進剿以期會攻蘭城掃蕩
浙東之賊此次出力各員謹先行開列懇

恩獎敘並請將失事各員分別懲辦奏入

上諭內閣曰浙江蘭谿踞賊分股竄陷嚴州府城提
督張玉良饒廷選在蘭谿拔隊往援立將府城克

復勦辦尙屬出力副將羅大春著以總兵用都司
吳金元著以遊擊儘先補用並賞加參將銜守備
張榮發羅大明劉廷芳均著以都司儘先補用千
總鄭春暉著以福建守備儘先升用張榮發等四
員均著賞換花翎其餘出力員弁著瑞昌王有齡
擇尤保奏嚴州府知府李文瀛署建德縣知縣李
長齡接仗受傷旋卽督團隨同克復功過尙足相

抵李文瀛著革職留任李長齡著加恩免其治罪
暫留署任署嚴州協副將陳步高賊至不守實屬
怯懦無能著革職發往軍臺效力贖罪仍暫留軍
營勦賊以觀後效副將陶占魁聞警先行帶勇出
城著革職拏問交瑞昌等嚴訊如有逃避情節卽
於軍前正法管帶防兵之遊擊劉兆選都司關貴
昌戴興劉廷玉李寬雄均著革職留營效力以爲

守禦不力者戒

同日都興阿奏言江陰賊衆由海壩陸路竄擾
壽星沙常熟之賊撥船接應當由黃彬分飭水
師會剿臣由陸路派隊馳往下游靖江一帶聯
絡水師以壯聲勢總兵李德麟帶划由福山溯
流而上會同參將郭定猷分投截擊逆匪復分
擾石牌黃田黃山等處牽掣我兵當經兵團合

力痛勦殲賊不知其數黃山黃田石牌三港賊
俱埽淨壽星沙賊亦敗逃初三四等日復勾結
江陰另股誘串奸民沙船四十餘隻潛由南岸
小港及海壩之港口覬覦北渡郭定猷等由壽
星沙南堽擊海壩魏麟彪等傍南岸直搗內河
小港及海壩中心三而齊進賊衆驚惶失措時
有江陰援賊數千飛奔來救斃其前隊數十焚

船三隻餘賊猶抵死抗拒我軍奮勇齊進奪獲
沙船四十餘隻陸路亦追殺無數該逆逃回江
陰燒賊館三十餘間又奪大小沙船二十一隻
郭定猷隨派礮划東下會勦黃彬復添派戰艇
將壽星沙迤東之白茆許浦鹿苑各口搜勦淨
盡同時常州逆首僞天安陳姓分股竄擾魏村
等處均經總兵周希濂副將鞠耀乾等擊散現

仍嚴守小河魏村各口以防常州丹陽等處之賊魏麟彪暫留下游隨同李德麟郭定猷等搜捕各小口餘匪

同日薛煥奏言蘇州崑山常熟等處之賊均有情願就撫之人惟青浦嘉定兩城逼近松江殊爲肘腋之患而青浦賊目麥姓張姓兇狡異常尤須先行攻剿現調李恆嵩來滬面授機宜並

與曾秉忠函商擬卽挑選精銳之師分爲三路
水陸並進併力圍攻一面密飭寶山各營進攻
嘉定以牽賊勢均奏入報

聞

薛煥又奏言已革兩江總督何桂清屢奉

諭旨飭催解京現在何桂清舊病復發實未痊愈又辦
理撫局漸有頭緒臣總當察看該革員病如就

愈無論招撫之事已成與否仍飭委員護解迅速起程斷不敢再任延緩奏入

上命載垣等傳諭薛煥曰何桂清係革職拏問屢催解京之員現在辦理招撫著卽飭令趕緊妥辦俟辦有就緒仍著迅速派員解京毋再延緩

初二日
戊午官文胡林翼李續宜奏言已革皖南

道李元度一軍自克復義甯州收復武甯瑞昌

德安後卽於七月初二日分兵兩路一路由義甯直擣新昌交界之棗橋地方一路直擣奉新交界之芋竹山地方爲進取瑞州之計連戰皆捷克復新昌奉新兩城復派隊收復上高欽賊均竄瑞州奉新各營乘勢直進出奉新城三十里大股賊匪列隊抗拒各營轉戰而前初九日逼近瑞州城外適新昌各營亦至夾攻瑞州各

勇見援軍趕到銳氣百倍大呼合擊逆賊大敗而奔截殺四五百名逃散數千溺斃無數都司易咸臨羅寅等首先登城新昌各營由北門入奉新各營由西門入署瑞州府知府陸澄帶領團勇隨同攻擊立將府城克復敗賊多竄臨江一帶查僞忠王李秀城自占踞瑞州後分竄上高奉新靖安安義建昌武甯義甯德安瑞昌以

及湖北之通城崇明通山蒲圻咸甯興國大冶
武昌等州縣而以瑞州爲老巢李元度提得勝
之師由楚入江節節掃蕩瑞州一鼓克復關繫
江湖鄂三省大局實足仰慰

宸廑各營出力員弁兵勇籲懇

恩施准臣等擇尤保獎奏入

上諭內閣曰李元度一軍自克復義甯後兩路進取

瑞州先將新昌奉新縣城克復進徧瑞州各營會
合攻擊逆衆大敗遂於七月初九日克復瑞州府
城其上高縣城亦經收復勦辦尙爲迅速著官文
等仍飭李元度節節前進將敗竄臨江一帶賊匪
悉數殲除出力員弁兵勇准其擇尤保奏

初三日 己未 田興恕何冠英奏言粵逆僞宰制張

遇恩自安順敗後經紳匪潛往勾結由六圭河

偷渡紮營朱場虎場距平遠州城僅一二十里
意在攻撲州城總兵周學桂等分路進剿斃賊
甚多該逆復乘夜撲營周學桂等派隊繞出六
圭河後暗襲賊營一面督隊分路迎敵賊衆大
敗暗繞僻徑偷過天生橋該處團練無多不能
抵敵該逆乘勢突圍畢節參將李有恆等拔隊
來援賊勢稍卻退向南街梓潼閣一帶當卽督

隊進城防守周學桂等由天生橋一帶跟追直抵大定府所屬沙子哨探聞賊將大定團營攻潰飛馬往援收集散團仍將原營奪回駐紮大定所屬之歸化橋距畢節二十餘里該逆約千餘人前來攻營三路齊撲各營分投接仗鏖戰數時賊始敗潰殺斃大半跟追十餘里直抵畢節城十里之頭鋪橋收隊是日與賊相持互有

殺傷周學桂潛約李有恆內外夾攻遊擊熊俊
奮勇陷陣受傷陣亡幸總兵楊巖寶各隊趕至
擊退各匪周學桂受傷過重回營旋即殞命臣
等當卽添派總兵吳安康等帶領所部前赴楊
巖寶大營合力進剿以厚兵力該匪晝夜環攻
畢節李有恆等督軍守禦破其轟城之計旋分
隊出城擊賊首逆張遇恩率衆迎敵擒斬甚多

該逆抵死不退適周學桂所部攻勦得手賊匪
後隊錯亂李有恆督令各軍直撲張逆該逆策
馬狂奔各匪四散逃竄賊復假造周學桂援軍
旗幟希圖賺開城門又經李有恆識破斃賊無
算該匪又於西北兩面增築營壘六座思阻糧
道李有恆督隊由西南兩門出擊立將賊營六
座攻破卽督隊分攻賊營張逆自出迎敵千總

高應選奮不顧身受傷陣亡各隊奮勇齊進將賊擊退五月十一日李有恆進攻賊巢逆首張遇恩督令羣賊拌死相拒李有恆射其咽喉卽時落馬隨將張逆首級割下各匪見首逆伏誅均皆奔竄吳安康楊巖寶各隊齊到揮兵圍殺屍橫徧野立將賊營二十餘處全行踏毀追殺三十餘里畢節之圍立解共斃賊匪三千有奇

斬馘二千餘級救出難民男婦老幼五千餘名
此次出力陣亡各員謹先行開列懇

恩分別獎卹其餘各員咨彙入定番案內請獎奏入
上諭內閣曰粵逆竄擾平遠圍攻畢節各路官兵攻
剿獲勝立解城圍勦辦尙爲得手參將李有恆著
免升副將交軍機處記名遇有總兵缺出請旨簡
放總兵楊巖寶吳安康均著交部議敘副將梁正

秀著賞加總兵銜守備沙春山著以遊擊補用並
賞換花翎軍功余高才把總高應階均著以都司

補用並賞戴花翎畢節縣知縣馬應鏜著開缺免
升同知以知府用並賞換花翎道員唐繩武著賞

換花翎卽選同知直隸州知州李家麟著免選本
班以知府遇缺卽選並賞換花翎知州彭培垣著
賞戴藍翎副將周學桂殺賊捐軀殊堪憫惜著照

提督例從優議卹並於貴州及原籍地方建立專祠遊擊熊俊著照總兵陣亡例議卹千總高應選著照遊擊陣亡例議卹以上二員並著附祀周學桂黔省專祠以慰忠魂其餘出力員弁兵勇紳團著准其附入克復定番案內擇尤酌保候朕施恩

初四日庚申曾國藩奏言左宗棠於五月閒由廣

信回駐景德鎮迎勦建德之賊六月閒分軍移

紮婺源迎勦閩汀股匪先是池州逆首劉官方
一股竄入鄱陽地界距景德鎮僅六十里間左
宗棠全軍至鎮卽夜遁走左宗棠派隊由桃樹
店橫出截之分路入柵樹嶺遇賊前隊各營自
嶺馳下賊衆奪路狂奔我軍躡蹤分追斬馘悍
賊百餘名賊知官軍抄出歸路將斷卽紛紛向
建德後河宵遁追至建德三里街斬其落後之

賊數十訊知劉逆遠遁遂收復建城而還維時
徽州甫復後路空虛婺源介皖浙江西三省之
衝左宗棠分軍三千留守景德親率各營移紮
婺源逆首賴積新一股糾合閩汀匪徒出竄頭
起約二萬餘人由常山抵德興之白沙關正派
兩營扼王瓜尖賊之前隊已踞德興之新建地
方距婺城祇四十里後隊繼至道員王開化等

周覽地勢擬由王瓜尖下出中路爲正兵而奇
兵由小路擣新建左宗棠又派撥各隊潛師悉
起副將崔大光等由左路進州同朱明亮由中
路進天明遇賊朱明亮大呼陷陣賊從兩旁松
林內抄出崔大光等突從左路繞出賊後各營
乘勢蹙之斬賊數百追及新建王開化會合進
擣賊已棄巢紛竄由新建五里外鳧水渡河忽

見追軍從谷口馳出盡棄礮械而走馬德順率
馬隊衝之賊分由兩岸高嶺攀躋而上我軍從
下擊之墜崖落澗死者無算追殺至白沙關共
計斃賊一千有餘生擒八十餘名解散以數千
計所餘紅旗一股仍向浙江開化華埠竄逸德
興婺源境內一律肅清於全局大有裨益出力
弁勇仰懇

天恩准其擇尤併入樂平案內分別優獎以昭激勸

奏八

上諭內閣曰池州逆首劉官方一股竄近景德鎮我軍攻勦大勝追至建德三里街立將縣城收復逆首賴蘋新一股糾合福建汀州股匪竄踞德興之新建地方左宗棠督兵攻擊斃賊無算餘匪向浙江開化華埠竄逸德興婺源境內一律肅清勦辦

尙爲出力著曾國藩仍令左宗棠激勵將士節節
搜勦出力員弁兵勇准其彙入樂平案內分別奏
請獎勵

曾國藩又奏言皖北四眼狗糾合僞輔王璋王
玕王等十餘萬衆援救安慶曾國荃一軍但主
堅守不主迎勦務使援賊與城中之賊聲息不
通庶皖省可期克復皖南徽州六屬除左宗棠

在婺源擊退賴逆股匪外其餘各縣各嶺均尙
安靜湖北南岸八屬一律肅清北岸德安府城
亦於十一日克復上游已有轉機若移得勝之
師併力下游則安慶之克尤有把握奏入報

聞

初五日 辛酉 官文胡林翼李續宜奏言臣等前派

副都統舒保等率水陸各軍圍攻德安府城該

逆堅忍死守我軍開挖地道節次轟發地雷雖城身屢次坍塌而逆衆立時槍堵六月下旬金國琛等激勵士卒築隄浚濠以四面長圍困其城賊絕其賊援長圍將成金國琛等遂於七月十一日令總兵蕭慶衍等在東西南三路長濠上豫爲埋伏而以團練扼守西北兩路又派副將楊富有扼截北門總兵彭星占扼截西門副

將于高勝等斜出西南邀擊總兵彭炳武等分
向左右包抄自率各營從中衝擊布置甫定城
賊由西北門出七八千人且前且卻我軍水陸
齊進賊衆披靡忽城賊又出五六千人圖抄我
軍之後楊富有等候賊隊盡出扼其西北歸路
會合各路馬步縱橫截殺賊敗盡奔河西伏兵
四起急架雲梯一鼓緣登迺斬守城悍賊多名

立將郡城克復共計斃賊三千四百餘名生擒
八百餘名救出難民二千七百餘名舒保金國
琛等審察敗賊必分走隨州應山各路當派彭
炳武等馳赴應山一帶追截金國琛會同舒保
向隨州一路前進追至平林市斃賊千餘沿途
復截殺三千有餘十三日至吳家店次日至萬
家店皆應山所屬斬馘亦多屍橫徧野統計追

剿敗賊共六千有奇內有賊目數十名生擒一百餘名正法餘賊逃匿應山信陽各鄉遂收隊駐營隨州相機剿辦並咨明河南撫臣飭屬一體防剿此次尤爲出力各員謹先行開列懇

恩獎勵奏入

上諭內閣曰逆匪竄踞德安府城經官文等派撥水陸各軍圍攻分路扼守賊由西北兩門竄出馬步

官軍左右抄擊水師登陸接應賊衆潰亂盡奔河西官兵緣梯登城遂將德安府城克復斃賊三千四百有餘復追殺六千餘名勦辦甚屬得手副都統舒保按察使彭玉麟均著交部從優議敘道員金國琛著交軍機處記名遇有道員缺出請旨簡放並賞加布政使銜總兵蕭慶衍著賞加提督銜彭炳武著交部從優議敘副將成得升周忠容均

著免補副將以總兵記名簡放張啟基著以總兵
記名簡放楊富有劉長槐均著賞加總兵銜參將
朱吉玉著免補參將以副將儘先推補並賞給懋
勇巴圖魯名號總兵彭星占副將李續遠趙太和
王載駟均著賞給各該員祖父母父母正二品封
典于高勝郭鵬程王聯芳均著賞給各該員祖父
母父母從二品封典都司王吉著免補遊擊以參

將儘先推補同知吳廷華著以知府升用其餘在
事出力員弁兵勇著官文等查明保奏

初六日壬戌毓科奏言石逆另股由湖南桂陽縣

竄入崇義之黃泥灣三月初六日竄至大庾之
沙村經南安府兵團擊敗悉由大庾小路口竄
往廣東之南雄州初十日復由南雄潛入信豐
意圖偷渡爲團練所扼先後竄至安遠定南長

甯地方各州縣處處有備壘次被剿遂於二十
日悉由長甯大厯村竄往福建武平上年安遠
分竄之賊平遠一股已歸併於武平探知武平
股匪亦與汀逆勾結臣卽飛飭在防各軍嚴密
堵禦汀逆果分三起先後由石城沿江等處竄
廣昌之白水寨巴口橋地方湖南郴州另股之
賊亦由甯都州竄廣昌之九里關壘經各路兵

圍堵禦賊遂分起竄走一由南豐瀘溪貴溪弋陽等縣邊境東趨一由新城竄福建光澤一竄撲興安縣城旋見援兵齊至當卽引去遂由德興竄入安徽婺源又有另股賊匪自新城竄至南城直撲建昌府城賊衆約三四萬各軍分門出擊擒斬三四千名救出難民八千有奇賊衆大敗悉奔南城金谿交界之珀玕地方屯踞並

於楓山鋪築卡以拒追師五月二十八日竄撲
金谿縣城遊擊萬立松等帶領水陸各軍會同
臨川金谿二縣團勇轟破楓山賊卡斃賊無數
賊遂竄由弋陽鉛山交界之湖坊而去珀玕之
賊先經平江昇字兩營會勦連破賊壘十餘座
殺賊一千餘名傷其僞丞相賴剝皮賊氣大沮
向瀘溪之高陂逃走湖坊之賊亦經道員屈蟠

派隊進剿大獲勝仗惟遺貴弋銘各鄉尙被盤踞江省信防各軍已爲皖浙各賊所牽掣知府丁峻所部現須扼守臨江以防瑞郡竄逆臣已飛飭知府張詩等剋期會攻以期節節掃蕩在事出力官紳可否容臣擇尤酌保出自恩施陣亡之都司洪兆虎把總黃永春謝茂榮金谿職員劉首占應請

飭部議卹其餘陣亡員弁勇丁查明另行請卹至金谿縣城是否被陷後卽經收復現已飭查如查有匪匿情事卽行據實嚴叅奏入

上諭內閣曰粵閩股匪先後竄擾江省勦辦獲勝在事出力官紳准毓科擇尤酌保陣亡都司洪兆虎把總黃永春謝茂榮金谿團紳劉首占均著交部議卹金谿縣城是否被陷後卽經收復著該撫查

明具奏如有諱匿情事卽行從嚴叅辦

毓科又奏言侍逆李侍賢股匪本年三月間自景德鎮敗竄安徽婺源旋陷浙江常山另股先由開化白沙關竄入玉山之童家坊等處直撲縣城署知縣章澂募勇千餘隨同道員王德榜等登陴固守賊黨假扮難民踵門求納王德榜探知其詐整礮以待賊果馳至王德榜飭令連

發數礮斃賊無算復派隊出劫賊營斬殺頗多
是夕常山大股逆匪擁至合攻縣城均經擊退
賊復乘風雨猛攻兢負雲梯直逼城根兵勇靜
伏堦下俟賊緣梯而上輒礮斃之賊始敗走忽
有白旗數隊稱係援兵徑薄北門城下大呼開
門王德榜識破奸計親燃大礮轟斃頗多賊悉
遁走旋築卡於三里七里街地方爲久踞計宅

掘地道以圖轟城王德榜縋兵出城馳入賊營縱火焚燒該逆猝不及防紛紛四竄我軍齊偪賊壘斃賊不計其數立將三里七里街等處賊壘踏平餘逆仍竄回常山六月十三日復由常山竄至玉邑賊衆約三四萬其主將爲僞丞相賴剝皮十四日直撲東北兩門城守嚴密賊勢稍卻十五十六等日疊次來撲均經擊敗訊據

逃出難民僉稱賊意欲踞玉山糾合湖坊踞匪
圖犯信郡逆首賴剝皮已於十五日破礮殲斃
都司哈必發等乘夜率隊出擊焚其輜重賊眾
驚奔殲斃不可勝計當將大小賊壘二十一座
全行踏平追斬二十餘里餘逆遁出屏風關外
仍向常山竄逸賊匪兩次撲圍玉山在防文武
員弁戮力同心且守且戰克復危城尙屬著有

勞績謹先行開列懇

恩獎勵奏入

上諭內閣曰玉山縣兩次擊退圍城賊匪防剿尙屬
得力道員王德榜著賞給銳勇巴圖魯名號遊擊
李佑厚著以副將仍留江西補用都司哈必發著
以遊擊補用並賞加副將銜署玉山縣知縣卽補
同知直隸州知州章澂著賞戴藍翎其餘守城出

力官紳弁勇准毓科擇尤保奏

毓科又奏言奉新之賊分股竄陷武甯靖安經
臣調派道員劉于潯分兵進攻又飭該縣營厚
集團勇以佐官軍武甯縣知縣翁延緒署都司
阿敦布募勇六千餘名分攻西南北三門潛伏
兵於東門外以便要擊六月二十日三面齊進
翁延緒轟燬北門外賊卡六座阿敦布進潯西

門城下槍斃守垛悍賊首先入城把總吳鳳儀亦向南門急攻賊不能支開東門遁走伏兵悉起截殺二百餘名餘匪竄逸追勦二十餘里斃賊無算武甯縣城卽於是日克復靖安自失陷後該縣知縣陶黼昌募勇集團於七月初三日向西北兩門進攻別遣紳團馳赴巫嵐瓦橋等處焚其賊壘初四日該逆開南門悉數迎敵衆

軍奮力鏖戰殺賊二百數十名賊卽大潰不敢
入城直奔巫嵐瓦橋該處賊壘已被焚燒遂奔
向奉新一路竄逸靖安縣城克復查此次武甯
靖安之賊意圖久踞經該縣營招勇收復雖未
能固守於前尙知愧奮於後武甯縣知縣翁延
緒署武甯營都司阿敦布靖安縣知縣陶黼昌
署靖安汛把總江殿龍可否開復原官改爲革

職留任出自

鴻慈奏入

上從之

十一日

丁卯

慶端瑞瓚奏言江右逆匪竄擾光澤

縣之白虎隘抄出鐵牛關後蠡擁而來經兵勇

聯丁兩路進剿斬馘數十名賊以三四千人竄

撲武關外之石灰寨營盤兵勇齊出奮擊傷斃

賊匪甚多賊又由閒道直撲火燒馬鈴鐵牛等
關均經擊敗斬殺多名踐踏死者不少賊衆奪
路竄去其鉛山縣湖坊一帶賊氛緊逼崇安沿
關肆擾復分股竄犯崇安接壤之車營草輿嶺
均經在防兵勇奮力擊退現在另有大股逆匪
上竄貴溪與湖坊之賊皆圖竄擾閩疆龍游股
匪亦有分派奸細潛入浦城窺探之說建甯邵

武各屬毗連江浙防守甚關緊要已革道員馮
席珍所帶弋陽勇二千名因衢防喫緊催令拔
隊赴援崇安兵力較單同知揭垂謙等所帶兵
勇一千一百名本令分防松溪政和現在松政
防務較鬆已一併調赴崇安分紮各關飭令約
會江西兵聯合力撓勦浦城僅有總兵曾玉明
所部兵勇五百餘人不敷分布業經分催林文

察一軍馳赴浦城扼防臣等總當隨時察看情形妥籌布置以期邊防益臻鞏固

同日楊載福奏言池州府屬殷家匯地方爲南岸之賊往來要徑賊匪築壘踞守壘後新開小河搭有浮橋可通池州府城總兵王明山等由水路薄壘進攻一面帶隊登岸圍撲濠牆賊憑牆力拒鏖戰多時逆勢不支參將趙三元揮衆

山下首登牆王明山等帶隊由上首摩壘而入
該匪棄壘狂奔追殺甚多溺斃亦衆餘賊悉由
浮橋竄去查池州時有賊股思竄東建股家匯
地當要衝該逆力圖盤踞便於接應出入臣惟
飭附近各營不時進湖搜巡毋稍疏忽均奏入
報

聞